

榴經堂類藁

籀經堂類藁卷第十四

晉江陳慶鏞頌六撰

壽序

壽邵武饒母鄧安人七十

秋塍饒明府宰浙之二年歲在己亥郵書以其母鄧安人  
七旬介壽來問序余與秋塍同譜得論交十八年矣久而  
知秋塍之孝國人僂頷然曰幸哉有子又久而知秋塍之  
孝皆其母之孝之教之有以成之國人僂頷然曰幸哉有  
母故宜有子母新城故處士鄧素園先生女也先生得子  
遲母以女代之緩急之需比於緹縈其事之也篤故其父

之愛之也鍾擇壻苛聞其鄉先贈君巽堂先生賢妻焉饒  
與鄧皆江右望族母年十七嬪于饒弗及事舅姑家道蕭  
然遂偕贈君入閩就光澤居贈君習會計而母以女紅佐  
之理中饋職勤勞治其家有常法其祭祀雖不及豐侈而  
必齋以慎其衣裳雖不及新製而必潔以完其飲食器皿  
雖不及齊具而必精以旨賓鄰戚屬偶告匱雖窘乏必設  
以措教子女和娣姒皆有條理母之歸也其家曰自某女  
適人而子事少所助饒氏之宗曰自某婦入門內事不失  
時而家業漸昌是可以知所教矣秋塋以壬午登賢書累  
舉進士不中乙未大挑知縣分發浙江檄之奉秋塋給假

歸省請迎養母恐傷於費弗就道比權武義篆郵示政治  
兼詢平反謂當以仁愛為主余讀班書雋不疑行縣決獄  
母問以所活何人范史崔實治五原母訓以臨民之政治  
績之茂得之母教者為多今秋膝卽以其母教者施於民  
行於政將循聲之誦歡入寢門而且伯子馨蘭叔子馨芳  
季子馨德或登

國雍或辟縣佐洩洩融融綽乎如四括之儒業冠時焉焜  
乎如四黃之友悌著美焉夫壽有三有王澤之壽有聲聞  
之壽有行仁之壽而婦人之壽則仁為先也母為淑女為  
賢婦是卽所謂仁者也孔子曰仁者壽

壽陳母楊宜人七十

陳母楊宜人者晉江處士世蒼之女

誥贈奉直大夫國學生崇菴之淑配而今刑部湖廣司主事大勲之母也道光十一年以子貴

誥封宜人今年登七秩正月十一日慶誕之辰吾鄉同官欲製錦以為宜人壽問序於予予曰壽者酬也酬人之有德也顧德存乎人是皆所自為者也福存乎天是莫之為而為者也人所為者語其事則人皆以為然而未必能然矣天所為者語其事則人皆欲然而亦未必能然也其幸而能然而或當於遇即遇矣而其德無以稱則又何以式

於家式於里人皆曰願然無間言若宜人者其為婦也舅  
姑稱孝焉伯叔姊妹稱友焉相夫子於家稱理焉及其為  
母也子若孫稱能訓焉宗黨戚族稱能仁焉凡此皆人以  
為當然而未必能然者而宜人咸能若是是其於德也可  
不謂然乎尚書洪範言五福福訓備福之備則又人所欲  
然而未必能然也然五福首壽富而總歸於攸好德誠以  
壽富者天所為好德者人所為天之所為必視乎人之自  
為由好德而壽富由壽富而益好德乃今於宜人備之矣  
既於其身且於其子孫四代一堂彬彬濟濟則其於福也  
又可不謂然乎初贈君習猗頓業山於梯海於航一切家

計皆宜人理之事姑甘旨無缺贈君歸而堂上有喜色妯  
娒亦怡怡始而然遲之久亦莫不然其僞理惡乎然曰僞  
鹽鼓治麻皐以待不時之需中饋之脩然乎然其僞訓惡  
乎然曰男課之讀女課之績撫諸子如已子式穀之似然  
乎然其僞仁惡乎然曰賙之貧者量其有無酌其多寡無  
鷄色無吝容陶母之教太邱之風然乎然子又生子孫又  
生孫遊黌序薦成均所以貽贈君之令名者繼繼承承吾  
又烏測其所以然叔子大年入臺泮捐緡助修省之貢院  
落成

天子下部議詔八品銜既而加按察使司經歷其季

掌刑部又其季大源選通判階前濟起雖曰父教則然亦  
惟母教之修故能然耳今夫受於人者厚則其報不容以  
或薄而況受於天乎蓋天之莫之為而為與其所自  
為常相因也吾為之歌風淑人君子其儀一兮其德之謂  
乎為之歌雅貽厥孫謀以燕翼子其福之謂乎為之歌頌  
俾爾熾而昌俾爾壽而臧其有德而獲福之謂乎樹堂奉  
母教以報於國仰思所以酬

恩俛思所以養志慄慄翼翼勵夙夜之勤虔共匪懈繇是  
鸞章疊錫秩之所及日益增報之所食日益厚以是為宜  
人篤嘏延祺引之期頤不亦宜乎衆皆曰然於是第其辭



而書之

壽福州林母謝太夫人七十

粵以端蒙大芒駱之歲榮光鏡河灑渠順軌恭逢

聖母萬萬壽

皇上特開恩榜優賢揚歷人瑞薦臻士女綏多五氏來備  
凡為南陔白華之賦者相戒以養各以其私忱恭鞠鞠臚  
奉觴上壽於其家春正月七日為避同里林殿撰勿村慈  
母謝太夫人七十正慶蠲告於三月令辰稱觥遙祝屆期  
勿村來請壽言以發揚太夫人懿德竊惟婦道唯事親相  
夫教子三事而已余嘗謂男子以孝為先婦人以順為首

順者順於夫也劉熙釋名曰婦服也大戴禮曰婦人伏於人也服伏同聲為訓皆言順也太夫人系出長樂僑省垣家焉父為某君官訓導有宿學女二親授德象書太夫人居少能籀誦解聲韻及笄通封翁小溪先生時食指數盈中饋賴以治封君業學婁應童試弗售尋家落走外郡寄跡猗頓太夫人事舅力益勤及病瘞侍扶持累寒燠如一其舅若忘其子之不在左右者無何封君賦閒室屢空數作宦遊太夫人內治家以女紅作饔飧質衣脩脰為二子延師課督暇則錄先哲格言指授其事親教子日兼盡之勿村能承慈訓與弟某同歲遊庠戊子舉於鄉封君之出

蓋有年矣于是計偕假道省於楚迎南旋入而家庭雍睦  
長幼秩如也丙申

萬壽恩科勿村以

廷對魁天下郵書至太夫人謂射策特科名耳報親仍在  
事業時作書策勵旣第之二年奉

特恩冊封琉球充正使

御賜一品蟒服英蕩過里閤禮君言不宿於家假館望拜  
二親人之見之者咸為其封君及其太夫人榮以為太夫  
人能順其夫以事親教子故如此而太夫人澹然湛然踏  
然瞿瞿然淑淑然曰親吾夫所欲色養者也吾事之而已

子吾夫所冀其成立以承先德者也吾教之而已唯願子之母負所學又惡知己之能事親能教子哉勿村使還額請得

允假省居踰旬誨益諳諳期滿復命深荷

天語溫諭庚子典山東試越年而封君之赴至星行奔里繼賴之飾太夫人治之壹於禮導除趣就職命之如初季介泰艷猶日誦古女史箴為子婦濫能作小楷書書常千言弗倦鄭康成箋詩謂女之有士行者曰女士亦稱士女故常釐爾多福今於太夫人見之矣昔歐陽永叔受母畫荻為教舉進士試南宮第一為名相蘇長公少時父外宦

母授以書侍讀范滂傳以滂自許母曰汝能為范滂吾當  
為范滂母後亦為名臣勿村其資母教以修於身施於政  
異日人以蘇公母母太夫人亦猶以范滂母母蘇公母也  
抑歐公之業尤賢乎上焉以是凝麻

壽寓延綰綽晉蕃釐用蘄眉象用保燕蕤斯太夫人之志  
日彰而封君之業亦日熾爰緝列女傳頌語一章為壽其  
詞曰賢行聰明通達知禮化訓内外教以事理子遂成德  
君子揚稱為當世冠名聲光榮

壽山西孟母溫太宜人八十

道光二十有四年歲次壽星之墟日躔婁四度于時孀星

朗耀五氏來備太史書

昇平之瑞其應及諸侯夫人大夫世婦我孟年伯母溫太  
宜人八秩開榮子婦士夫繡雁垂魚斑衣起舞長君拜乎  
前次君拜乎後幼子童孫繞膝而進環列階下一時都士  
大夫凡與其家長幼輩同譜同寮同業者競製詩歌割辭  
緝雅敷藻屑金以為壽太宜人之季子又章比部與余壬辰  
同譜並出光祿李滋園夫子之門交最善得悉其家政因  
屬余言以榮諸錦余惟古者閭必有史以紀道誼以光簡  
編而婦人之德亦有女史以書之錄其行著其微故鍾之  
禮郝之法百世下猶奉為女宗若以文壽人之例肇于元

之楊虞諸公壽婦人之例肇于有明諸公然詩之頌魯侯也稱令妻並及壽母周彝器之銘多為其母及其伯姊諸姑用斬箸壽用丐永年故梢妃彝曰保親燕陲姜涇簋曰眷壽純魯則壽婦人古亦有之吾鄉安溪李文貞公謂古人未嘗不及此況人子之情有不能嘿而已者邪雖然男正位乎外女正位乎內婦人之德必其有合于四行七誠十二訓者斯可以文年伯母溫太宜人者幼誦德象之篇知書能詩初溫家以文武閥閱為晉望父母知其女之賢擇其壻無可與齊者聞霽嵐年伯名能嗜學其才可以配是從媒者言卜曰吉遂妻之入門公姑稱慶其賢如其女

家言比年伯以拔萃科需次學博宦遊四方家中事無大小一切屏當族之人無論長者幼者疏者戚者咸稱禮儀法度為中表則可不謂賢歟長嗣先修以上舍生副賢書次先恆

敕贈承德郎三先穎進士官刑部安徽司主事即余同年又章也太宜人以子貴

覃恩如今封又章向與余述及母教幼時讀書母嘗以篝燈績紵課之每至漏三商弗輟余以是知太宜人之賢而能教也及余官御史隸江南道向例江蘇安徽二司每定讞由江南道會鞠余以公至其司詳又章所擬律輕重適



均顯若一嗣又章官提牢位庫案獄興廉之海垂墨誤者  
積於紆余巡察所部見若盧都內胥廉者感法外仁又章  
常以其藥餌施諸病者詢之又章告余曰此吾母夫人之  
意也言彼等亦人子須善視之務得所余又以是知太宜  
人之賢而能教教而能補於治也漢書著雋不疑每行縣  
錄囚還其母輒問所平反活幾何人平多母為之喜悅飲  
食言語異於他時而于定國以治獄多陰德高大門閭今  
太宜人之教其子如此是可以風矣夫有德必獲報為善  
無不昌太宜人之為婦為母莫不咸則數十年懇懇勤勤  
不大聲色而四行七誠之所克敦十二訓之所克勤加以

慈而能仁九宗三鄰無不歌其淑德年八十鶴髮皤皤身  
其康彊子孫其逢吉天之所以報施者正未有艾也至其  
家世之華與先從繩武仁聲之播則諸君子業知之而能  
言之矣余故即又章之為余言知其教之有成壽之所以  
稱者其道畢著

壽同安陳母李宜人六十

班固通論云壽者酬也所以酬人之有德也壽而有德斯  
稱壽焉易美恆其德貞言婦德也婦人之德無儀必于從  
父從夫從子為德觀劉向所傳列女曰賢明曰貞順乃於  
今于陳母見之矣陳母李宜人者江州司馬之配而壯烈



生家貧以舌耕就外塾母當易裙釵為菽水之供逮司馬  
官皖江繼任浙江台州甯波嘉興諸劇郡時海上蔡逆為  
梗司馬勞於旁午母脫絁奩以為捕盜資俾海氛以掃此  
宋鮑女宗之治絲璽以養姑衛姑定姜之決筮從以禦寇  
也其教子女督孫曹也不以姑急為愛司馬棄世時母年  
三十有七子四長筠竹未弱冠餘子女皆幼母撫之男課  
讀書女課鍼黹比成立筠竹以例授鹽知事諸子皆蜚聲黌  
序丁酉筠竹將就官粵東母訓之曰汝父居官廉愛民如  
子女當勉之母墜家聲且有汝弟在家毋以吾為念也是  
年叔子秋崖以上舍生膺拔萃科越戊戌

朝考一等第一以知縣分發四川一門彬濟其孫亦蔚起  
有孝弟風此魯寡陶母之紡績以養幼孤齊田稷母之却  
金以教廉潔也夫坤道無成而代有終今母事事合於古  
所云以是知有德之必酬報而壽之大可稱也且筠竹秋  
崖相繼服官各將以其母教者發為事業宏為經濟異日  
晉爵升階使母榮起居之奉膺錫命之隆將德星之輝與  
婺星之耀重聚於吾陳氏是則余之厚望也夫  
壽馮蘭垞母林安人七十

天下言治生灋猗頓猗頓用煮海起名顯諸侯仁義附焉  
世以稱吾鄉馮致園先生操是業能以其贏均兄弟拒鄉

黨卹貧窮治橋梁脩寺觀是所謂富而好行其德者也其子章曰蘭垞大令食舊德易賈而儒計研之策旣已試于家而用施於國下帷攻書自當時諸老及知名之士見之咸嘉歎以爲樹德之報而慕先生之有子矣蘭垞來京與余善聆讜論具出至性余心韙之歲丙午將爲其生慈林太安人壽造余廬逡巡而言曰章不肖亦何能報稱先業哉凡章所以稍有知識者皆章母林安人之教也安人及笄歸侍先君及先慈張太宜人奉事以曲謹聞章有兄曰纘先嫡慈施太宜人出曰繹先繼慈林太宜人出皆早世章少孤露家計浩大安人理之嘗戒章曰爾父少讀書以

家累業鹽得稍裕凡所營運無私積與諸父昆弟共之此  
吾親見爾父之行於家者也置族中祭田建支祠疏戚待  
舉火者無下數十家此吾親見爾父之行於族者也賑粥  
施槥為醵者卹為累者埋修建道路溝渠宮院祠宇無下  
數十處此吾親見爾父之行於鄉者也爾父歿先後存債  
券無慮數萬金諭悉焚之余謹遵命毋留以為爾累也今  
雖家落以是知汝父之必將有後也汝勉之毋辱令名章  
聞之怵惕無似弗克繼承先志逾冠領副車越八年舉於  
鄉十試禮部不中乃納粟為縣令需次銓曹今吾母年且  
六十有四矣謀所以舉觴無以榮吾親媿何如也余曰不

然君子之事親亦於其大者而已致園先生澤流子孫而  
安人復以仁惠佐盛美觀於焚券一事已屬古稱難能蘭  
垞欲報其親報之以富貴不若報之以德澤聲聞科名顯  
晦何關榮辱漢司馬相如張釋之皆為貲郎不以秀孝進  
而其事業文章特表著於當時後有述焉今試與蘭垞遊  
太學觀石鼓松檜之下屹然而簇立者歷代題名碑也目  
不暇觀手不暇指而求其能以文章傳者百無一焉求其  
能文章而兼有事業者千無一焉其事業文章能如司馬  
相如張釋之而為論古者所慨慕且萬無一焉蘭垞奉揚  
母教以淑於身卽不登賢書且不補博士弟子員其所以



揚親者自在剡出而為親民之官敷布尤易為力百里雖小論語曰有民人焉有社稷焉泰山之雲不崇朝而徧雨乎天下以是為報親不亦宜乎周顓立勳晉室服官清約有令名高其生母李氏門第為方雅之族是則以事業文章顯親者蘭垞勉乎哉

壽鄭母陳孺人八十

己亥秋九月八日鄭母陳太孺人八十壽前一年其嗣蘅洲孝廉來都訪余屬余序余幼里居卽耳贈君景彌先生名欽其學問醞粹并其家政為閭里式繼而與孝廉伯兄星垣廣文遊相從計偕途次每語必及其母余聞之既詳

而歎太孺人之賢也太孺人出余族潁川歸鄭門事舅姑  
嘗脫簪珥以為甘旨奉初贈君家淡力於學太孺人茹苦  
自如凡一切中饋事悉身任之故贈君得以肆志藝林國  
人稱有賢內助其後教子若孫若伯叔之子孫皆嚴而有  
法而於學無不勉己郊辛郊二誥嗣皆舉於鄉猶子簡可  
亦以明經選司鐸暨其孫先後升於學者踵相接太孺人  
之賢於人遠余以獲交廣文久得備悉而廣文丙戌大挑  
授甯德教諭未竟其志今孝廉克振前業余見而喜聞太  
孺人無恙又幸一門之多美材也昔歸熙甫為莆田宋孺  
人九十壽序稱吾閩為山水奧區瀉和清淑之氣發為講

學抱藝之士著乎勲業文章而耆艾長年在乎山澤之間者尤多也太孺人之賢而壽而其家之多材如是非所得乎淳和清淑之氣者耶其亦無異乎熙甫之云耶況孝廉之學與藝奮發乎文章醞釀乎事業固將大起其家使太孺人之賢益以祿而壽益以永也則謂吾閩淳和清淑之氣鍾於是焉可

壽靈石楊母王淑人六十

卷韞韜脰奉觴上壽甚盛典而其祝必甌窶滿簞汙邪滿車豐年穰穰然後備禮若儲石之家稱觥設饌其鹽齏鯽鯢黃帛鰯鱖麋豕殽蜀雉鹿羅胡檄蟲舉可為儀然珍

差則善矣而養志則未也墨林子言相祔以養采白鵲繫  
蘭膳不關於俗之所為子言來學余嘗至其家數見兄弟  
怡怡外焉肅肅蓋能承家灋以志為養者尊甫兵部武選  
司員外郎五橋先生棄世司麻瘠一紀家政其母王太淑  
人理之能教誨式穀以侶歲逢游兆頓牂于是年六十矣  
墨林謀舉觴問序於余曰佳二十有六年九月旣生霸辰  
在甲午用介壽于母夫人宗家佳母受姓于太原降生于  
靈石受讀惠象窈窕女師笄過于我先考昌邑乃元配逮  
事于先公先姑甄槃棗鼎夙夕敬龔母廢簪乃饘飽酒醴  
芼羹菽麥蕡稻黍梁朮呂甘呂滑呂膏治乃家蔑麻亡乃

子女從父累第子女從且累第子女嫁昏衿纓慕履先考  
不強括髮且暨追孝于補宮繫用案盛蘋蘩蘊藻且荐宮  
祀且安需奠簪乃考仕乃樞轡亡官于員外勤勞乃事吏  
立中庭冊命

皇帝曰咨暨女通奉大夫女寤王氏淑人錫女鸞誥朱錄  
帶束元纁且亡爾庸今我先考嚴在上翼在下愷愷能能  
毋其用康景福佳茲佳介辰啟丐壽言用斬屯右通奉月  
保燕薤子孫甘養寶余曰奉觴之典備矣盛矣五味之酥  
八珍之膳於山剽象白握脣霜鵲露鵲封熊之蹠翰音之  
跖於水則蘋尾丹腮紫翼青鬢范公之鱗萊黃之鮒於陸

則火棗火梨蟠桃蒲陶杜杞樵柿荅邏離支穠黃之蘇白  
露之茹且夫織文纂組金襲丹縵衣服之屬也文咸宋蔡  
淮南弓遮音樂之盛也玫瑰碧琳璫玉荀唐赤瑕駸犂蜀  
石黃磬玩好之珍也凡可致之物皆足以薦蕃釐介繁祉  
墨林力能致之何以文為墨林曰否否窮海之錯極山之  
珍命曰饕餮之府華飾累身音樂累耳玩好累目君子弗  
驕也吾母之所教者佳積呂誠竺呂謹愔於身而已它弗  
及知余向察墨林之所呂戚與子言之所呂學知太淑人  
之教有以培之因稱識墨林之能呂志為養也爰諾其請  
為文以壽用大吉日震譽弓嬀壘集弓嫫女乃爰彰華簪

蛟壺俾昌俾清舞用樂半鉉乍賓饌晏飲母氏受壽重福  
綰綽靡壽諸友殮飮晏飽伯氏中氏翬首昇壽

壽劄母許恭人六十

漢劉向著列女傳十五篇曹大家為注益以陳嬰母及東  
漢以來凡十六事其所言師傅保姆之助詩書圖史之誠  
珎璜琚瑀之節威儀動作之度咸臻極備吾閩劉氏世簪  
纓門內雍以睦人見之而不知其所以然實本於家道之  
脩數千百年猶守中壘遺訓今歲咸豐壬子大比樞部岐  
農應京兆試錄其母許恭人懿行乞壽言恭人者候官名  
族女也曾祖崇楷令山西聞喜有政聲代為儒恭人幼而

孤鞠於母終鮮兄弟然伯叔諸姑諸姊妹皆宜之笄嫁同里嘉慶戊寅孝廉南安學博奐為先止為繼配初學博娶卓恭人卒遺其女僅數齡恭人撫之如已出理中饋躬勤勞能隨先後緩急為樽節見於舅腹脩棗栗必敬有事於時節朝夕共賓祭各有條序屢以不及事姑為憾而事其庶姑如姑其舅喜曰自婦來吾不以家為卹矣助夫讀離鳴戒旦肅肅無倦容及仕能以其首肯餘澤贍諸四從六甥省鳳池書院膏火缺勸夫竭力捐縉以倡并為族立本范參方堂以給婚者嫁者病者貧無以葬者其夫歎曰吾能一肆意於為官不累其志者許氏助我也歸十年始得



子曰齊莊殤復得子曰齊昂卽岵農樞部也少受學於其父旣違訓延師課益嚴適

朝廷諭沿海增築礮臺恭人乃思漢卜式輸家財之半助邊名借以顯遂令

奏職入都并勛以仕學不偏廢仍赴鄉闈成先志也恭人之見蓋其遠者大者夫非古烈婦之所爲而劉傳之所稱賢明者歟來春正月上元爲恭人週甲正慶禮重憲言之典詩歌壽母之文要必其教之本乎師傅保姆德之合乎詩書圖史節之中乎珩璜琺瑯度之昭乎威儀動作然後介壽稱觴若恭人之爲女爲婦爲母亦庶乎其可焉爰書

其實者以為女宗式

壽姚母沈太恭人七十

昭陽赤奮若紅艇齒我天戈凡附島居民都警風鶴常熟  
瀕海也驚走播告胥動以浮言議徙宅以避姚母沈太恭  
人聞焉呵其家勿遷涕遂息越今十有二載矣

天子聖哲日重光月重輪河清海晏西母有來朝之慶祥  
及士庶人適太恭人七十正度其子福增與余同譜又同  
官以壽言請余故服太恭人之識之有以服於鄉也而又  
誦太恭人之教之有以型於家也太恭人幼事父晚香公  
以孝聞笄嫁姚氏為我年伯

誥贈朝議大夫某翁德配入門不及事姑事生祖姑庶姑  
奉藥進盥以次上舅氏稱曰賢侍舅自始至終先意承志  
如一相夫教子咸有則初從母有遺其息而卒於產者抱  
育之勝於已出諄諄屬乳嫗夜常三四起不能寐詩曰淑  
人君子其儀一兮是之謂推其愛以及其所愛乎屠維大  
淵獻朝議公無祿長子官京師弗及視殮餘子始克負薪  
凡衣襪含玉一以身理之無遺憾戚鄰稱曰賢性好施與  
已雖搢搢萬難而以急告者必為措設咸周俾得其意以  
去祝犁作鄂月浸于析木之津邑大水道殢相望命二子  
出為鳩貲賑卹夜歸則代指畫叅稽務歸輒當活者萬數

東海莫不賢知其母國人稱曰賢然人知太恭人之德之  
有以及於鄉而不知太恭人之教之先有以型於家人知  
太恭人之教之先有以型於家而不知太恭人之識之卓  
尤先能以信於其家者信於其鄉而遂信於其國則所以  
錫福受釐陔蘭祴養或名高易編或慶叶鹿鳴而思樂采  
芹孫枝且相繼而起者其來有自

壽武母趙太恭人七十晉五

詩書之言女德尚矣若夫哲婦隆家人之道貞女抗清白  
之風則其徽美未殊也是以傳稱衛姬共姜之德史著榮  
升叔先之賢而曹大家以博學高才入東觀受書其時同

郡馬融伏於閣下從而受讀又恐子穀負辱朝廷作女誡七章書成錫金紫一時傳為佳話維武母趙太恭人宣化騎尉偉業先生長女也幼嫻女則習德象之篇於經史多涉獵略能發大義及笄歸廣平為中憲大夫某翁茂才德配入門舅姑稱慶而姑張太恭人疾時作奉湯藥必口先嘗然後進凡厠諭之事悉親滌之弗假童僕手嘗秋夜露跪中庭為姑乞壽久之得寒嗽疾不言亦不輟方贈君之力於學也負笈就外傳太恭人橫經絳幔集子女口授六經四子書家中經理觀若一而叔子年方束髮亦就學焉比贈君遊泮逾年赴召玉樓時舅猶在堂服勞益勤遭喪

雖斯如禮自是家亦少落矣躬紡績屢達旦不寐米鹽時  
不足於供至於敗絮納棉衣為裘兒輩皆不知之而筆札  
之給未嘗缺君子以是知後之必有昌也叔子既析居拙  
於謀食家產蕩然學輟太恭人命與同爨復卒業補博士  
弟子員此尤難人所難者年逾七旬習勤弗懈聞以內長  
幼式序清讌屢舉劉中壘列女傳及諸先賢閨訓課諸婦  
諸女諸女孫自奉從儉樸而遇族黨冠昏喪葬質釵助之  
余辛亥因友人得識仲子汝清與談論相得及觀其為政  
不屑屑於營求持法必伸雖捐廩有所弗恤昔雋不疑行  
縣錄囚母問所平反活幾人不疑以有對母喜或亡母怒

為之不食自來積德之家賴於母教者類多如此汝清咸  
道光庚子進士薦升刑部員外郎今

上御極之二年紀元咸豐歲壬子

特開春榜伯子澄清復以樂亭教諭第進士即用知縣季  
子河清亦舉優上舍一門濟濟青紫後先得非太恭人之  
教之有以貽之哉詩曰釐爾女士從以孫子鄭箋謂女之  
有士行故宜錫福受釐延及後嗣太恭人以子貴  
誥封宜人晉恭人道光二十四年奉

旨旌獎節孝洵盛典也溯女嫺之星戌戌晨以降迄今四  
百六十四甲子矣而苦節之貞半三萬六千場將介期稱

觴爰不揣固陋為文以壽之

壽孫母蘇太夫人八十晉一

已酉余主講玉屏得肄業孫生長齡詢知家世淵源稟諸  
祖母教者為多越二年供職諫垣適尊丈儀國總戎介圭  
入

覲畢事來訪為余言吾孫氏五世零丁賴吾母維持家政  
得漸昌今屆八帑將以明年十月二十六日為吾母八十  
晉一壽請為文以徵諸實余惟詩咏竹苞松茂即後世壽  
文所由昉而雅歌釐爾女士頌美令妻壽母則婦人壽言  
自古有之孫母蘇太夫人青箱閱閱籍海澄自曾以下武



任提封文膺郡篆繼之以成均觀政幼得閨禮教於其父  
若祖若曾祖嫻女儀年二十適龍溪故貢生今贈振威將  
軍啓堂先生為德配贈公瞻亭軍門長公子也入門軍門  
適外宦太夫人廟見遙拜時有祖姑在堂而姑不及事也  
奉養無婦姆亦無妯娌分勞悉身任之唯勤無何歸五載  
贈公無祿總戎甫二歲太夫人年二十五誓指柏舟從死  
已而念子女皆幼搢搢強起為承事尋遭祖姑喪軍門泣  
鎮黃巖含殮皆出一手督虎門仍留太夫人主其家內外  
稱治久之軍門之喪至自粵命子扶服歸櫬大事咸賴以  
襄道光七年邑紳上其狀以節孝旌遠近榮之莫不歎太

夫人之德之足以裕後也總戎起為政以廕生授通判兼  
襄騎都尉世職蕩平海寇屢立戰功出為福建水師遊擊  
累遷至江南福山鎮總兵功多

賞戴花翎凡總戎拔一幟移一階必貽書以戒舉祖為訓  
至是總戎來京憮然有懷每思賦及來諭但以渥受

兩朝知遇且累世受功未敢陳情余謂侯海上肅清永致  
太平則報

君卽所以報母少安須臾未為遲且聞太夫人家居頤養  
如常尚能課督孫曹與前之課督總戎固無以異松筠之  
操久而彌貞則其所以得於天者將光遠而益大也爰綴

數語以侑一觴

鑑經堂類藁卷第十四

錫照堂類藁卷第十五

晉江陳慶鏞頌南撰

跋考

演礮圖說輯要跋

甲辰夏林太史晴皋以丁星南演礮圖說輯要四冊見示予於算學疎舛且儀器之製未之學也爰屬友人鄭澣香復光丁心齋守存互相釐訂於其疑者條而辨之審定鄧霍卽於原書槩識其處圻以質正澣香鄭君者徽之歙人精心算學為儀器積有成書其創測海鏡測天鏡測遠鏡獨出心思巧奪前人而丁心齋為山左日照人前與余同

官農部究心武備嘗出使析津船輪船不資人不用火駛  
海上可左可右其精思特出古作者傳曰巧者述之其稱  
是矣星南與予同籍少遊賈舶涉海外諸邦所至留心礮  
法其於各島礮式船製習聞習見隨在殫心講求既復下  
以已意推測勾股密率參酌盡善不遺餘力孫子蕩杯之  
學煥然復見于向訂交心齋數年而星南並未謀面今讀  
其書如見其人知其有心於世也爰書之以見海內多材  
二丁並稱云

正字略跋

余友萊友精於六書上及倉頡史籀船書遺意著有說六

釋例八卷未梓茲先付栞正字略定本其書簡明易曉使  
初學者一覽了然讀許氏書者以此為津逮可也道光十  
有九年三月既望

許吾田宗寅新得遼金二碑跋

癸卯之夏余始識許君吾田孝廉於都門獲觀所著書頗  
富而於地理水道稽誤尤達其年吾田卽獲雋京兆得時  
過從今歲乙巳冬臈自寶坻主講北泉書院來為余言新  
得遼金二碑其一在廣濟寺為遼重熙五年立檢校司徒  
撰文千五百餘言其一在大覺寺為河中張瓚撰文頗漶  
漫碑陰載金太定二年勅牒計遼重熙當宋之明道金大

定當宋之紹興二碑皆在七百年前物而著錄缺之王青  
浦金石萃編未之見而余友韓小亭有志續刻金石於遼  
金元三代遺文搜羅不遺餘力而此刻亦未及見豈非沈  
霾已久無從搜討必待其人而後出耶吾田耆學好古每  
所到必訪求名賢古蹟所在其有合者輒摩挲盡日而不  
能去於此見之秋濟案吾田以丙午五月二十日卒於郡門之桐城試館同人臨金助其歸櫬生年著述甚多皆未梓行聞平歸零落矣秋壽與吾田為同年生而未獲謀面按先生集因附識此以存其姓氏云  
桂皓亭說文部首句讀跋

近世治說文莫名一家而余推殺茂堂桂未谷二書為大宗段務精微桂致廣大讀說文者於此歎觀止矣為句讀

之學則吾友王萊受大令筠著有說文句讀十六卷其書折衷段桂二家之說而復加精密叙次一以易經序卦為例讀者便之而吾宗雪堂比部山嵎亦好是學取法王書定句益當輯成授兒孫皆能全部習誦一字無譌余向欲索鈔適有南行之役未果比回京而比部差次灤河莫得借觀好書與良朋馳念交至今歲壬子得與南海桂君皓亭遊往來互以文字相質知其酷嗜許書久矣乃念說文揀字之難往往尋求一字終卷不可得歟為部首句讀一卷依篇為章因章分句以墨子衡讀之例讀之可令學僮諷誦宋潛溪學士滌篆韻集鈔謂部端五百四十字蓋卽



倉頡篇然則熟此可謂能通倉頡讀矣河間苗仙麓明經  
亦有建首字讀一書其義主於諧聲句取叶韻長短不齊  
而此卽以三字四字為斷更便於初學余謂擴而充之卽  
篆文九千三百五十三字解說十三萬三千四百四十一  
字取雪堂所輯之書全而誦之更為執林盛事則以是為  
讀說文入德之門可也是為跋

郭米山求是錄跋

米山世承家學曩嘗抱其尊人右房先生易易錄一冊來  
問序其書多得宋儒精蘊為讀易一助茲米山復以所自  
著求是錄携京質證大都發明論孟二書之旨大義一以

集註為字其有集註未盡善者則旁列注疏及漢以來諸家遺說叅詳考證未乃斷以己意而加為論辨不好新奇而但取淳實河東薛氏瑄曰讀聖賢之書字字句句見有的實方為實學況論孟所載皆天地古今萬事萬物之理能因書以知理則理有實不然書自書理自理無惑乎終身由之而不知其道者衆也今世之為學者好攻抵前人遂至立為門戶之見不知立言不在乎艱深奇古貴乎明理而已如程朱之說平易簡實而理自明朱山竊奉是說以為書其有補於程朱之學者已不少況進而求之年力方富學且益深當幾於大醇而無疵矣咸豐二年日長至

跋於都門之西柳樹井

林梧圃詩鈔跋

梧圃余同年友也曩計偕相遇都門每酒酣耳熱輒慷慨激昂自抒所志乃屢上春官報罷遂出為令攝湖北應城篆繼遷石首最後權蘄州事未竟所業遽歸道山今猶子范亭農部抱其詩集來屬并言余披覽數日其紀勝諸詩則風景如畫也其贈友諸詩則表情如訴也至其讀史數作則又議論特識直抒胸中所見不肯妄下雌黃詩可以見性情於此得其概矣若夫風調之古音節之高於淡蕩可以敵玉局於豪放可以敵青蓮而於奇險峻奧可以敵

彌明知於此道三折其肱然梧圃之真孝友所蒞官每汲  
汲於愛民興學校獻疑獄倡義舉必求得於民者而後止  
固不以詩鳴者也詩特其一端耳而亦可見平生志之所  
之而不苟同於波靡委隨者之所為矣咸豐元年二月花  
朝跋於京寓之籀經堂

韓樹屏夫子秋江歸棹圖跋

樹屏師正色立 朝聲望隆天下壬午春余應童試得受  
知賞最深遂以是年與計偕造謁都門飲食教誨備至越  
通籍而師已歸道山泰山梁木無自瞻仰曷勝愴懷近吾  
閩諸同人為師恭請

崇祀名宦蓋盛德在人久而必報時師之誥嗣淦琴尹晉  
篆出所官侍御時乞假事親所繪秋江歸棹圖系以同朝  
諸公題詠詩冊將槩屬為校余纔讀衆徧而見吾師之忠  
于而國皆其孝于而家也東哲補笙詩云循彼南陔言采  
其蘭子夏序云南陔孝子相戒以養也中庸言順乎親故  
能獲乎上信乎友吾師乞養而贈詩章者繞朝則信及於  
其友矣師後除導出山累遷至工部侍郎兼禮部侍郎中  
間栗階卿貳皆能以忠誠為事持英蕩來閩孜孜培養士  
氣文風為之一新口碑之載今猶頌之所謂移孝作忠不  
其然歟慶鏞不敏末由克承師訓一覽其圖竦然見楷木

之猶存焉竊願淥琴以師之所治者爲治則韋平之業自有傳人矣道光三十年春正月人日謹識

呂西村愛吾廬筆記跋

日僊游講席假王大懷佩家臧桂未谷先生札樸一書讀之所論纂經史緒言及金石文字審致邳雀比回呂子西村同年以自著愛吾廬筆記郵祿屬弁語偕幡延月咸伸奧窔極萃尊實事求是獨能於

本朝間潛邱錢潛研劉武進諸先生外獨闢已見囊所未備其辨復古籀則直追倉史籀辨掃洪薛歐趙而空之析衷貴當能發六書神指書視桂氏篇帙稍簡而醕實過之

吾謂二書徵引則桂從其詳而呂從其畧稽誤則桂得其博而呂得其精醞然粹然礪然晰然卽以是爲札樸之續也可西村精篆隸嘗手摹漢碑數十種槩石行世得之者珍如拱壁家居著書自娛不妄投刺鄉里重之尤爲同譜中所矜敬是書成於日記隨手掇錄乃舉以示生徒者俾來言當糾其繆者或付之祝融氏何其自視歆然耶抑或更有進於此矣爰跋而歸之以與桂書並行不悖云

林歊雲叢記跋

讀書將以致用學者束髮受經便期於遠者大者自謂能文章通經世至問其所學何事則爽然失矣及近而叩之

以當世之務風俗之是非世情之厚薄則又漠然若罔聞  
知同安獻雲林君負奇氣講究農田兵禮有用之書不屑  
為科舉學向刻文鈔初編所論水利平穀濬濠及防禦巡  
哨占測諸作皆洞達古今利弊大有關於經濟近復自厦  
來訪談及海島情事縷縷皆能言之出所著叢記一書大  
約樸記師友往來事實而其流覽名勝記載賈舶出入情  
形廣袤里數則尤熟焉能詳足衷魏默深近刻海國圖志  
所未備是其志之遠且大者而其言之足以致用也爰述  
數語以弁于編道光二十九年上元後一日跋於漢瓦晉  
軌之室



于復齋四書辨字跋

言字學者必宗說文而說文唐以前無完本至大小二徐乃論定其說然經三寫魚成魯烏成焉別風淮雨之譌學者患之于生復齋潛心祭酒之學近取四子之書其偏旁點畫沿誤已久者詳加釐正一以說文為宗倣唐張參五經文字及唐元度九經字樣二書之例逐字叅訂必求其不悖於六書而後止則有是書而讀四書者可奉為圭臬矣爰跋數語弁於首

韓滌琴規政吟跋

程子曰一命之士苟留心於物於物必有濟矧今縣邑大

者周五六百里視古侯國猶或過之一念及民受濟者當不下千萬計淥琴以優薦出宰方隅泣閩十餘年矣初篆大田繼調浦城詔安所至能親民能愛民近治晉江余以世交時過從見輒數問俗利弊余亦屢以吾師司空公之所以視學於閩之政相勗談暇檢笥中田陽南浦贈行詩章皆其平日所得於民者民道其實形諸歌詠以為祖道之贈以是見留心於物於物有濟親民者民恆親之愛民者民恆愛之也然我之所期於民者固不在是即民之所期於我者又奚止是且吾晉為其先代宋魏公發祥之所忠獻流風猶有存焉指而望焉不嘉樹遺蔭蒼然蔽芾甘

崇勿剽勿伐竊願激勵之振拔之遠以承相國之家聲近以守司空之法矩則異日治晉之政當有大於治田治浦者公羊傳曰泰山之雲觸石而起膚寸而合不崇朝而偏雨其在斯乎道光庚戌春日跋於籀經書府

李忠定公墨跡跋尾為李蔡南嶢

春秋責備賢者忠定公仕宋當金人遣使議和人謂公當力諫其不可許不宜去國以致汴京失守兩宮蒙塵然金人方欲滅遼以及宋而宋先自敗其盟以理論之金直宋曲而欲以孤兵無援力戰成功難矣公之去非畏敵也上之不能言聽計從下之不能志同道合義不可以苟留所

謂可以止則止也及高宗卽位起用為相人謂有君如高宗有臣如汪黃小朝廷安望有為卽出亦當遣使入金謝罪痛哭陳詞迎還二帝然以金之狡獪何可與言公出而卽以恢復為圖黽勉鞠躬俾安社稷其功不在韓范文富下君子之所為衆人固不識也今

皇上御極之初準禮臣請以公從祀

孔廟公道自在人心洵不刊之盛典也公善書不以書名其墨蹟更不多見觀其筆法蒼古獨往獨來氣節形諸楮墨間卽唐之虞褚不是過也余因觀公之書論公之事亦以見君子之出處在大而不在小也於是乎書

周忠介公手札跋尾應潘博士曾璋

余向得觀楊忠愍公臨節誠子二書墨蹟讀之令人潸潸  
淚下今復見周忠介公被逮時與文湛持先生手札四通  
其一初入縣署中言一腔憤淚俱化作鐵腸石心其一言  
一生向志節一路著力其一言此行方欲以一身之膽消  
諸君子之隱禍其一則於二鼓登舟時旌旗戈戟相望於  
道謂周生此時可不寂寞嗚呼詞氣凜然公可謂素患難  
行乎患難無入而不自得矣考公當日以祖餞魏忠節公  
大中解京觸逆閹魏璫怒遂誣以贓賄遣縱騎下逮吳中  
聞者憤怒號冤塞道公獨談笑自若懼忻順受遂瘐死獄

四時天啓六年六月十有七日戊子也其被逮時則為二月戊戌明年莊烈帝卽位誅魏瑞贈公太常寺卿謚忠介建祠賜額然則此書當在二月蘇門縣署及舟中作也字畫遒勁雅近顏魯公其一氣孤行則與忠愍公風骨為一忠愍公書旣已摹石崇度於其祠公書亦當刻之吳下以爲鄉人士式

洪稚存先生萬里沙圖跋

丙午秋道過常州訪余友子齡舍人旣見出其尊丈稚存先生萬里沙圖屬題余因索當日所上成親王書橐本讀之一字一血落落數千言令人毛髮森動其萬里沙圖卽

戎役時事也觀先生伊犁日記自國門至嘉峪關

凡四匝月奉

嚴旨不許涉筆作詩遙遙萬里渺無人蹤徑天山涉瀚海  
險阻備嘗無聊學繪事圖山水以畫當詩庶幾得永日焉  
嗚呼若先生者其不媿古名臣之風矣道光二十六年九  
月十一日謹跋於先生之讀書舊舍

劉文正公墨跡跋尾為伊小沂念曾

劉文正公勛業氣節冠當時固不以書名然偶爾作札神  
致超超彌不可及存者少見此卷為伊墨卿太守家藏法  
物其鈐尾若紀文達王文端朱文正董文恭阮太傅桂未

谷王夢樓吳穀人王芭孫皆乾嘉中名輩儒林文苑畢萃  
於此滿紙琳瑯斑斕彙鼎洵足以資眼福矣道光二十六年  
十月朔敬跋於杭州僦廬

劉文清公墨跡跋尾為伊小沂念曾

文清公書法出入鍾王坊間傳者多廣託余曩於燕庭廉  
訪家得從觀公與文正公書牘往來無下數十冊皆論家  
事上及國事諸利弊文字與書法皆足千古然韻語少概  
見此卷皆吟咏詩章則尤寶中之寶矣謹跋之以歸小沂  
明府襲而藏之

跋劉誠意伯墨跡為端木叔總百祿



史載劉青田洪武三年授宏文館學士十一月進開國輔  
運守正資善大夫上護軍誠意伯祿二百五十石明年賜  
歸老於鄉隱山中飲酒奕棋口不言功後以談洋被訐詣  
京八年復遣使護歸卒年六十五此作稱洪武五年正家  
居謝客時年六十二也所錄真人詩十一首為九天彌羅  
丈離弟子奉勅演教徑山作亦借以養晦之意其筆法道  
勁逼近鍾繇當摹諸石以為壽世之寶云

衍聖恭愍公墓誌銘跋尾為孔舍人憲彝

衍聖恭愍公墓誌內載懿德碩行足以光諸家乘垂之  
國史矣竊謂聖人之後恪主祀壺脩廟宇擴林地習禮儀

新俎豆設樂器訂樂章培樹木編譜系皆職分所當為獨  
其精確專壹訪求先賢宰我墓地及疏請周公端木氏閔  
氏言氏卜氏後裔皆得以博士世襲厥功為偉至  
幸魯盛典一書鉤稽纂緝進蒙

聖祖仁皇帝御製序文復蒐討闕里數千年事實典章著  
為志刊布海內則非其好學深思究心文獻何以及此宜  
乎遭逢

聖明宮銜特進有加無已其異數為不可多得云

書闕里孫孺人墓志銘為孔君憲彝

鄭康成箋詩女士以為女之有士行者然必其德足以垂

闕教而後其名歸之余讀羽琤山氏龔君所誌闕里孔母  
孫孺人墓其於德若藝誠闕中之錚錚矣要其大端莫過  
於孝親睦姒教子貞疾弗蠲難人所難是卽所謂士行者  
而通繆篆施金石特其餘事耳抑又聞之君子有孝子孝  
子不匱言能和其德天自錫以善人也孺人教行於家而  
其子繡山舍人又善承母志克篤前烈以無失闕里家風  
則又詩所稱釐爾女士從以孫子也夫

語助冠首字法考

宋史載陳騭著文則一書有矣法乎法者法哉法等則矣  
法如板詩辭之輯矣民之洽矣辭之懌矣民之莫矣之類

是也乎法如莊子邴邴乎其似喜乎崔乎其不得已乎之類是也者法如考工記脂者膏者羸者羽者鱗者之類是也哉法如舜典臣哉鄰哉鄰哉臣哉之類是也然此類皆為語助注脚今取其可以冠首者著於篇一之法曰之朶漢書郊祀志祠之朶山于腫韋昭曰之朶山在東萊縣朶苑之朶山在登州福山縣漢武帝至此聞稱萬歲曰之朶漢書郊祀志八神將自古有之六曰月主祠之朶山曰之而考工記作其鱗之而鄭注之而頰頰也又文心雕龍之而於以乃劉句之舊體則之而亦可虛用曰之無唐書白居易傳其始生七月能展書姆指之無二字雖百數不

差曰之溪一統志瀘州合江縣有之溪曲折如之字曰之  
卦左莊廿二年傳周史有以周易見陳侯者陳侯使筮之  
遇觀之否閔元年傳畢萬筮仕于晉遇屯之比僖廿五年  
傳晉侯勤王筮之遇大有之睽襄九年傳穆姜筮往于東  
宮遇艮之八史曰是謂艮之隨沙隨程氏曰二爻三爻四  
爻變以本卦為貞之卦為悔曰之子詩之子于歸爾雅之  
子是子也曰之姓姓譜之姓漢有之馬宇曰之字容齋隨  
筆曰漢高祖諱邦荀悅云之字曰國惠帝諱盈之字曰滿  
曰之牙易續彖之牙經典釋文云之牙徐五加反鄭讀曰  
互曰之交小雅十月之交毛傳之交十月之交會曰之今

關雎疏之今矣也之類本取以為辭雖在句中不以為韻故處末者皆字上為韻曰之乏右軍草訣歌撇之非是之曰之綱之紀大雅假樂之綱之紀詩序嘉成王也一者法曰者侯秦詛楚文六書正訛云者古諸字曰者舌魏書西域傳者舌國在破洛那西去代一萬五千四百五十里太延三年遣使朝貢自是不絕綱目集覽云者舌國古康居國也大延北魏太武帝年號曰者考朱子文集云顧野王玉篇偏傍多誤收者如者考老是也曰者達宋史地理志鞏州有者達堡曰者都元史列傳有完者都又完者拔都疑一人曰者帖明一統志女直悉境歸附自開元迤北因

其部族所居置都司一衛一百八十有四者帖列山衛明  
永樂六年置曰者鷄明一統志者鷄山在廣南府富州東  
南九十里高可二百仞怪石嵯岬曰者卜明一統志者卜  
河在普安州東南一百八十里源出楊那山流為磨溪下  
流入盤江其地四時常暖土人冬月遷居其旁曰者克明  
永樂七年彌勒州土官者克遣使來朝貢馬曰者樂亦曰  
者島明史列傳者樂甸本馬龍他郎甸猛摩之地永樂初  
者樂甸夷名者島曰者鳩明史正德十一年雙蠻阿又礫  
者吐者鳩等流劫至十五年討擒之餘黨悉平曰者種興  
圖考廣南府有者種河曰者賴者郎興圖考土富州有者

賴河者郎河曰者曰郭忠恕佩觿集云迎這之這為者回  
之者曰者箇毛晃韻畧曰者猶此也凡稱此箇為者箇曰  
者番曰者般猶言這番這般也一矣法曰矣川唐書南蠻  
傳先時有傍矣川羅識二族通號八詔其後矣川羅識奔  
神川都督送之羅此城曰矣苴唐書南蠻傳施浪詔其王  
施望欠居矣苴和城夷語坡陀曰和曰矣和唐書南詔十  
臉有矣和臉夷語臉若州曰矣縣郝京山髦書唐進士有  
單姓主司誤書單請改正主司曰方口人口何足致辨答  
曰台州吳縣作呂州矣縣可乎主司無以應曰矣層明一  
統志曲靖府亦佐縣治西有矣層山山有清泉居人皆汲



飲之方言以水為矣曰矣邦明一統志矣邦池在廣西府  
治南周三千餘里半跨彌勒州界水源有二一出阿盧山  
麓石竅一出彌勒州吉雙鄉南流入盤江曰矣馬陸伯存  
廣輿記雲南圖安府南有矣馬都曰矣鮮明來知德字矣  
鮮著周易圖說曰矣其王右軍草訣歌矣其頭少變兵共  
足雙聯曰矣焉竇革酒譜曰今人多以文句首末相連謂  
之粘頭續尾嘗有客曰維其時矣自謂必無矣字居首者  
欲以見窘於答者不知矣焉也者決詞也出柳子厚文遂  
浮以大白言聲相混也曰矣夫何晏論語解曰聖人受命  
則鳳鳥至已矣夫者傷不得見也曰矣岐毛詩彼徂矣岐

韓詩作彼岵者岐曰矣乎花名有笑矣乎一焉法曰焉使  
周禮秋官之屬行夫焉使則介之陸德明釋文曰焉劉音  
夷注曰夷使使於四夷曰焉逢史記麻書太初元年歲名  
焉逢攝提格索隱曰歲陽在甲曰焉逢曰焉支史記匈奴  
傳霍去病度焉支山千餘里括地志焉支山一名刪丹山  
在甘州刪丹縣東南五十里習鑿齒與燕王書山下有紅  
藍花北方人採其花染緋黃按取其上鮮英者作胭脂曰  
焉耆漢書西域傳焉耆國治員渠城去長安七千三百里  
曰焉鳥亦曰焉鳳說文焉鳥黃色也出於江淮禽經黃鳳  
謂之焉曰焉酸山海經鼓鍾之山有草焉方莖而黃華員

葉而三成其名曰焉酸可以為毒駢雅曰焉酸可以毒魚  
曰焉居穆天子傳癸亥天子至于焉居禺知之平郭注曰  
疑皆國名曰焉焉周伯琦曰焉本焉字曰焉焉古諺字經  
三寫焉為成馬曰焉始淮南時則訓天子焉始乘舟注焉  
猶於也顏氏家訓曰葛洪要用字苑分焉音訓若訓何訓  
安當音於慙反於焉逍遙於焉嘉客焉用佞之類是也若  
送句及助詞當音矣慙反故稱龍焉故稱血焉託始焉爾  
晉鄭焉依之類是也曰焉依王慙野客叢談曰左傳晉鄭  
焉依者謂晉鄭相依耳焉者語辭而庾信有晉鄭靡依之  
句非是曰焉爾春秋隱二年紀履緌來逆女公羊曰譏始

不親迎也始不親迎昉此乎託始焉爾曷為託始焉爾春  
秋之始也何休曰焉爾猶於是也一乎法曰乎民山海經  
南海渚中有神曰乎民處南極以出入風曰乎而詩齊風  
俟我於著乎而孔穎達曰乎而只且之類也漢書地理志  
注乎而語助也曰乎爾趙岐孟子注乎爾者歎而不怨之  
辭也曰乎歟柳宗元答杜溫夫書曰乎歟耶哉夫者疑辭  
也曰乎乎郭忠恕佩觿乎乎平聲與入聲相對上語助下  
將取曰乎此張揖廣雅乎此只且沫旣央極已也曰乎乎  
乎年乎未草訣歌未乎手似年歷代楷法曰乎手于予縛  
勾澠水曰乎吁周伯琦曰乎乎吁氣小爾雅烏乎吁嗟也

曰乎通易繫辭發乎通見乎遠釋文乎通本作爾曰乎胡  
秦風吁嗟乎不承權輿爾雅郭注胡不承權輿是乎胡通  
訓也曰乎介易憂悔吝者存乎介釋文乎介音界曰乎土  
易百穀草木麗乎土王肅本作地曰乎葭漢書王子侯表  
葭葭康侯澤顏師古葭音乎葭乎古字通一哉法曰我始  
爾雅釋詁哉始也曰哉延爾雅哉延邢昺疏延者今墓道  
也曰哉周詩陳錫哉周毛傳哉載也左昭十年傳引陳錫  
載周曰哉載詩載見辟王孔疏哉載義同曰哉才邢昺爾  
雅疏哉者古文作才說文才草木之始初也曰哉毫伊訓  
朕哉自毫孟子作朕載曰哉兆管子書風重投之哉兆國

有據星浮邱之戰彗之所出曰哉基爾雅初哉首基曰哉  
魄亦曰哉霸書康誥惟二月哉生魄偽孔傳自十六至晦  
皆為生魄汲冢周書哉生霸魄了翁曰尚書哉生魄說文  
魄作霸从月霽聲霸魄之義容有不同曰哉明書武成厥  
四月哉生明孔疏其年四月己丑朔哉生明謂四月三日  
月始生明曰哉折 本朝官制一等侍衛烏珠折爾幾西  
呀二等侍衛哉折爾幾西呀一也法曰也毆石鼓文以也  
為毆秦斤同曰也匜六書正譌也古匜字借為語助辭助  
辭之用既多故加匜為匜以別之實一字也曰也窟宋理  
宗嘉熙十一年即蒙古憲宗元年也命也窟帥師伐高麗

曰也埋宋史黨項傳建隆二年代州刺史折也埋來朝也埋黨項之大姓世居河東有捍衛功曰也孫元史至治二年諸王按梯不花等迎晉王也孫鐵木兒於北邊九月晉王卽位於龍居河晉王世祖長孫甘麻剌之子繼英卽位是為泰定皇帝曰也足黃山谷有題覺範老人也足軒詩曰也里朮元史河源志水南來名忽蘭又水東南來名也里朮合流入赤賓其流浸大始名黃河曰也兀明一統志鉏兀長官司在和泥之地宣德八年置蠻謂之也兀曰也今明一統志女直朝貢地面有也今河廣韻孺河邊地也曰也密明景泰三年亦力把里國王也密力虎貢玉三千

八百斤曰也皓也道廣東志崖州威恩縣沿海黎人聚居有也皓州也道州以上之者矣焉乎哉也七字就其所知可以居首者注之以供文人采用容俟補蒐再當續入唐刻襖帖攷

揚州唐柘田觀察人埴家藏唐刻襖帖汪容甫儒林於乾隆年間拓數十本嘉慶以後石已遺失拓本傳世者亦少道光十六年四月四日儒林詰嗣孟慈同人為展襖之會因以其尊公手拓襖帖裱入圖首臧之僧寺定武襖帖石刻相傳宋南渡時在揚州失去此石雖未必即失去之石然通體具有篆法與鍾太傅書相類古人鍾王齊名良有



以也趣字帶隸法有兩漢遺意欣字絕似章草較勝東陽國學額上諸刻不類宋已後翻刻本定為唐刻無疑儒林家藏有定武五字未損本此本尤勝真唐刻也唐時不止一本觀者詳之

今人多疑右軍書禊帖無隸書遺意不知唐初歐褚虞三家為右軍之支流餘裔尚帶隸法豈有右軍書轉失隸意竟似宋以後書法耶蓋今之禊帖多宋人轉刻譬如見優孟而思叔敖顧虎賁而識中郎未必其果能奪真也容甫先生叙禊帖謂固知固字向之二字古人云云字悲夫夫字斯文文字與魏始平公造象記梁吳平侯神道石柱絕

相似蓋謂其所藏定武五字不損本今觀此刻趣字亦然  
誰謂右軍書無隸意耶晉人書無隸意何以歐褚虞有隸  
意耶埒辨於此以質後之攷古者

